

LIGJI NR. 08/L-157**PËR NDRYSHIMIN DHE PLOTËSIMIN E LIGJIT NR. 06/L- 123 PËR FORCËN E SIGURISË SË KOSOVËS****Kuvendi i Republikës së Kosovës:**

Në bazë të nenit 65 (1) të Kushtetutës së Republikës së Kosovës,

Miraton:

LIGJ PËR NDRYSHIMIN DHE PLOTËSIMIN E LIGJIT NR. 06/L-123 PËR FORCËN E SIGURISË SË KOSOVËS**Neni 1**

Ky ligj ka për qëllim ndryshimin dhe plotësimin e Ligjit Nr. 06/L-123 për Forcën e Sigurisë së Kosovës.

Neni 2

Neni 3, pas nën-paragrafit 1.18. të ligjit bazik shtohen nën-paragrafët e rinj 1.19., 1.20., 1.21., 1.22., 1.23. si dhe paragrafi 2. me tekstin si në vijim:

1.19. **Mobilizimi** - është akti i thirrjes dhe grumbullimit të komponentit aktiv dhe rezervë për detyrë aktive. Mobilizimi i Forcës së Sigurisë së Kosovës mund të jetë i përgjithshëm ose i pjesshëm;

1.20. **Gatishmëria e FSK-së** - është gjendje ose aftësi në të cilën është bërë mobilizimi, organizimi, stërvitja dhe FSK-ja është e gatshme për të përmbushur misionin e saj;

1.21. **Fushat dhe degët e FSK-së** - janë pjesë të FSK-së brenda të cilave përgatiten dhe pajisen pjesëtarët, njësitë, me qëllim ruajtjen e gatishmërisë luftarake të njësive;

1.22. **Specialiteti profesional ushtarak** - detyra ose grupi i detyrave që një pjesëtar i FSK-së është i kualifikuar për t'i kryer në bazë të trajnimit, aftësisë dhe përvojës së fituar, të cilat janë bazë për caktimin dhe avancimin e tij;

1.23. **Komandimi dhe kontrolli** – është ushtrimi i autoritetit dhe drejtimit nga një komandant i caktuar mbi forcat e caktuara dhe të bashkangjitura në përmbushjen e një misioni.

2. Shprehjet tjera të përdorura në këtë ligj kanë kuptimin e njëjtë me përkufizimet e dhëna në Ligjin Nr. 06/L-123 për Forcën e Sigurisë së Kosovës.

Neni 3

Neni 8, paragrafi 1. i ligjit bazik, ndryshohet si në vijim:

1. Pjesëtarët e Forcës së Sigurisë së Kosovës u nënshtrohen legjisllacionit të aplikueshëm të Kosovës, të drejtës ndërkombëtare të luftës dhe të drejtës ndërkombëtare humanitare, brenda dhe jashtë vendit.

Neni 4

Neni 10, paragrafi 3. i ligjit bazik fshihet si dhe paragrafi 4. ndryshohet si në vijim:

4. Përdorimi i forcës, duke përfshirë forcën vdekjeprurëse lejohet nëse rreziku nuk mund të

shmanget me mjete të tjera. Forca e përdorur duhet të jetë në proporcion me rrezikun dhe në përputhje me sistemin juridik të Republikës së Kosovës ose legjislacionin ndërkombëtar. Parimi i proporcionalitetit të përdorimit të forcës zbatohet vazhdimisht në lidhje me forcën që përdoret nga FSK-ja.

Neni 5

Neni 11, paragrafi 2. i ligjit bazik, ndryshohet si në vijim:

2. Mobilizimi në kohë paqeje bëhet me vendim të Ministrit të Mbrojtjes dhe ekzekutohet nga KOMFSK, sipas planifikimeve, kërkesave stërvitore dhe operacionale.

Neni 6

Neni 16, nën-paragrafi 3.2. i ligjit bazik ndryshohet si në vijim:

3.2. të bëjë gradimet, emërimet, ndryshimet, shkarkimet dhe lirimet nga detyra në gradën e Gjeneralit, pas pranimit të propozimit nga Ministri, sipas rekomandimit të komandantit të FSK-së;

Neni 7

Neni 18 nën-paragrafët 1.1. dhe 1.2. të ligjit bazik ndryshohen si në vijim:

1.1. të propozojë programe të veçanta financiare për mbështetje të Forcës së Sigurisë së Kosovës sipas rekomandimit të Ministrit të Mbrojtjes;

1.2. të iniciojë dhe miratojë rishikimin strategjik të sektorit të mbrojtjes, bazuar në ndryshimin e ambientit të brendshëm dhe të jashtëm të sigurisë dhe rekomandimeve të Ministrit të Mbrojtjes.

Neni 8

Neni 21, nën-paragrafët 5.4., 5.5., 5.7. dhe 5.10. të paragrafit 5. të ligjit bazik, ndryshohen si dhe shtohet një paragraf i ri 5.12. si në vijim:

5.4. KOMFSK përgatitë dhe miraton Tabelën Organizative të Personelit dhe Pajisjeve, pas aprovimit paraprak për ndryshim nga ana e Ministrit të Mbrojtjes;

5.5. për planifikimin, përgatitjen dhe orientimin e fondeve të Forcës së Sigurisë së Kosovës dhe propozimin e tyre të Ministrisë së Mbrojtjes;

5.7. të veprojë si këshilltar kryesor ushtarak i Presidentit, Kryeministrit, Ministrit të Mbrojtjes, si dhe Këshillit të Sigurisë, anëtar i së cilit është, për çështjet të cilat lidhen drejtpërdrejt me FSK-në;

5.10. përfaqëson Kosovën në nivel të shefave të mbrojtjes në çështjet e mbrojtjes dhe sigurisë në nivel ndërkombëtar;

5.12. Propozon personelin e uniformuar për shërbim në Ministrinë e Mbrojtjes me kualifikime sipas përshkrimit të vendeve të punës dhe kriterëve të veçanta të përcaktuara nga Ministria e Mbrojtjes.

Neni 9

Neni 23 i ligjit bazik, ndryshohet si në vijim:

Neni 23

Organizimi dhe struktura e Forcës së Sigurisë së Kosovës

1. FSK vepron në tërë territorin e Republikës së Kosovës nëpërmjet zinxhirit të unifikuar komandues.

2. FSK përbëhet nga personeli profesional aktiv, rezervë, kadetë, rekrutë dhe personeli civil.
3. Struktura dhe numri i pjesëtarëve të komponentit aktiv dhe komponentit rezervë të FSK-së përcaktohet bazuar në Rishikimin Strategjik të sektorit të sigurisë dhe sipas nevojave shtetërore të përcaktuara nga Qeveria e Republikës së Kosovës.
4. FSK-ja është e organizuar në shtab, komanda dhe njësi: Shtabi i Përgjithshëm, Komanda e Forcës Tokësore; Komanda e Gardës Kombëtare; Komanda e Logjistikës, Komanda e Doktrinës dhe Stërvitjes.
5. Njësitë e FSK-së ndahen në fusha, degë dhe specialitete profesionale ushtarake. Ministri i Mbrojtjes me propozim të KOMFSK-së nxjerr vendim dhe përcakton specialitetet profesionale ushtarake.
6. Në kuadër të Shtabit të Përgjithshëm funksionon Njësia për Operacione Speciale.
7. Në kuadër të Forcës së Sigurisë së Kosovës, funksionon Qendra e Studimeve Universitare/Akademia e Mbrojtjes e akredituar nga autoritetet kompetente të Republikës së Kosovës.
8. Komandanti i FSK-së, sipas nevojave dhe kërkesave operacionale, ka autoritet që të krijoj forca për detyrë.
9. Komponenti rezervë i FSK-se rregullohet me ligj të veçantë.
10. Emërtimi i kazermave, njësive, shkollave dhe institucioneve të FSK-së bëhen nga Presidenti i Republikës së Kosovës pas propozimit nga Ministri i Mbrojtjes dhe KOMFSK.

Neni 10

Neni 24, i ligjit bazik ndryshohet si në vijim:

Neni 24

Shtabi i Përgjithshëm i Forcës së Sigurisë së Kosovës

1. Shtabi i Përgjithshëm i Forcës së Sigurisë së Kosovës udhëhiqet nga Komandanti i FSK-së dhe përbën strukturën organizative më të lartë ushtarake komanduese në FSK. Shtabi i Përgjithshëm është përgjegjës për krijimin e një force luftarake të aftë për të plotësuar misionin kushtetues dhe detyrat ligjore të Forcës së Sigurisë së Kosovës. Në gjendje të jashtëzakonshme, Shtabi i Përgjithshëm vepron si Shtab për Komandantin Suprem.
2. Detyrat kryesore të SHPFSK-së përfshijnë:
 - 2.1. zbatimin e politikave, planeve dhe strategjive për zhvillimin e burimeve njerëzore në FSK, duke përfshirë implementimin e procesit të përzgjedhjes dhe rekrutimit, zhvillimin e karrierës, mbajtjen e standardeve dhe mbështetjen e personelit, kushtet për shërbim dhe mirëqenien e personelit në FSK;
 - 2.2. grumbullimin, analizën, planifikimin, përgatitjen dhe koordinimin e inteligjencës dhe masave të sigurisë për misionin përkatës;
 - 2.3. zhvillimin, planifikimin, përgatitjen, mbikëqyrjen dhe vlerësimin e operacioneve, stërvitjeve dhe gatishmërisë së FSK-së për përmbushjen e misionit kushtetues e ligjor;
 - 2.4. planifikimin, zhvillimin dhe monitorimin e mbështetjes logjistike të FSK-së, brenda dhe jashtë vendit, si dhe zbatimin e politikave logjistike, infrastrukturën, kodifikimin dhe informatizimin për funksionet dhe shërbimet logjistike dhe mjekësore;

2.5. planifikimin, hartimin, integrimin dhe monitorimin e planeve të zhvillimit të FSK-së, bazuar në objektivat strategjike të MM-së dhe udhëzimet planifikuese të KOMFSK-së;

2.6. bashkëpunimin ushtarak ndërkombëtar në interes të rritjes së aftësive dhe kapaciteteve ushtarake për përmbushjen e misionit të FSK-së në mbështetje të forcave partnere;

2.7. mbajtjen, planifikimin, organizimin, zhvillimin, standardizimin dhe modernizimin e sistemeve të komunikimit dhe informacionit të sigurt dhe të mbrojtur, për mbështetjen e komandim-kontrollit në FSK si dhe aktivitetet e sigurisë kibernetike, për të siguruar lirinë e veprimit në hapësirën kibernetike të FSK-së dhe në të njëjtën kohë të sigurojë mbrojtjen kibernetike në të gjitha sistemet;

2.8. sigurimin e mbështetjes administrative, profesionale dhe teknike të Shtabit të FSK-së dhe njësive të saj.

Neni 11

Nenit 25, nën-paragrafi 2.1. i paragrafit 2. të ligjit bazik ndryshohet si në vijim:

2.1. OF0 Nëntoger.

Neni 12

Pas nenit 26 të ligjit bazik, shtohet nen i ri 26A me tekstin si në vijim:

Neni 26A

Aktivitetet arsimore dhe shkencore

1. FSK-ja mund të ofrojë dhe pranojë trajnime, shkollime dhe shërbime përkundrejt pagesës në qendrat e saj trajnuese për nevojat e MM/FSK, institucioneve shtetërore dhe ndërkombëtare.

2. Në zbatim të paragrafit 1. të këtij neni, Ministri nxjerr akt të veçantë nënligjor.

Neni 13

Aktet nënligjore

1. Aktet nënligjore për zbatimin e këtij ligji nxirren ose ndryshohen më së largu në afat prej dymbëdhjetë (12) muajsh nga hyrja në fuqi e këtij ligji.

2. Aktet nënligjore që janë në fuqi vazhdojnë të zbatohen, deri në nxjerrjen e akteve të reja nënligjore, me kusht që të mos jenë në kundërshtim me këtë ligj.

Neni 14

Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 08/L-157
10 nëntor 2022

Shpallur me dekreten Nr. DL-332/2022, datë 25.11.2022 nga Presidentja e Republikës së Kosovës Vjosa Osmani-Sadriu